

GALÁCIA EIPI WATWAT PEAPTUP PAULO EMUMUDUPMUBARARAKTUP

¹⁻² Galácia eipi watwat, cartadup mubararağ òn eywebeaptum—Jesus Cristo kayayũ beaptum. Òn Paulo. Ijodiat ġu juk onomuwã Jesus Cristo emumujum. Deus warara'acat pe ġu onomuwãat Jesus Cristo emumujum.

Jesus Cristo ma juk o'e owebe: — Wekawẽn muwẽnuwẽn'ukan cuy ece — i.

Ixe ebay dak imẽn o'e owebe—Deus ma. Ixe Deus waram Jesus Cristo o'ğutait ce'ũap tomukadi. Kato mujujum òn eywebe ijudup pe. Soat e'em kato'i eywebe oxeacat tak—Jesus kayacat—wuykitpitpiyũ.

³ — Bay, xipan cuy Galácia eipi watwat ejukuk — i òn e'em Deus pe—wuyebay be, Jesus Cristo be dak—wuykukukat pe. — Ixeyũ ağuy mubabibin cuy eğuy — i òn e'em cebe ip.

⁴ Cristo oe'ũ ikērēat uk am soat pewi wuywebewi. Oe'ũ wuywebe Deus kay'ũmat ekukuap tağ wuyekuap puxim. Jeweweju ma oe'ũ. Oe'ũ Deus bikuyap tağ—wuyebay bikuyap tağ. ⁵ Imẽnēju:

— Bay, soat podi ma ěn edipap kuğ — i juy ace Deus pe.
— Bay, soat podi ma a'òbaca — i dak cuy ace cebe.
Soat em ma juy imẽn acece cebe.

⁶ Wağuybabi'ũm'ũm cĩcã eykuğ! Ibun ġu eyetabut Deus kay. Ğaxĩn ma jeyağuyba'ũm cekay. Kuy ġu juk eyetabut epesop cekay. Ixe juk eynaē jebekitkiyũm. Jekpot kukap co'i xipan eykuğ—Cristo kukap co'i. Eyju bit eybu'u ġuto epesop cekay. Warara'acat ekawẽn kay dak eyju ġasũ bit.

— Ijop ekawẽn kawẽn idipat ocexe — i eyju e'em te'e ma.

⁷ Warara'acat ekawēn pit kawēn idipat ġu—Jesus ekawēn acā. Warara'acayū bit eymu'ukpiceġen ojuy. Eymubu'un ojuy ip Jesus ekawēn kay. Cristo ekawēn muwarururun ojuy ip. Imēnpuye waġuybabi'ūm'ūm cīcā eykuġ.
⁸ Kuy juk adi kawēn idipat oceġuwēnuwēn eywebe—Jesus ekawēn. Ġasū bit kuka wara'at ekawēn ma oceġuwēn eywebe.

— Ijop ekawēn ma kawēn idipat — i kuka oce'e eywebe napa ma.

Imēn oce'e buje, Deus kuka ocemuju ipiat'ajojoap kay. Ġasū bit kabi bewiat kuka wara'at ekawēn o'ġuwēn eywebe.

— Ijop ekawēn ma kawēn idipat — i kuka o'e eywebe napa ma. Imēn i'e buje, wūy ma jeenuy Deus wi ipiat'ajojom. ⁹ Kuy juk iboap oceġuwēn eywebe. Imēnpit ġuto waram oceġuwēn eywebe. Kuy bima juk adi eyetabut epesop kawēn idipat kay. “Ijop ekawēn ma kawēn idipat” i'e'em napa ma wara'at ekawēn ma imuwēn puje, wūy ma jeenuy Deus wi ipiat'ajojom. ¹⁰ Ōn pit ijodiat mucokcok pin ġu oce. Deus mucokcok pin acā ōn pit. Warara'acayū be “Paulo xipat cīcā” i'e'eap kudadam ġu ōn. Ijodiacat mucokcok pin pima, kuka Cristo a'ō kay kūyjobican ġu oce!

¹¹ Okitpitpiyū, ijodiat ekawēn muwēnuwēn ġu bit ōn. Ijodiat ekawēn ġu ma i ġuto ōn e'em eywebe. ¹² Ijodiat ġu juk kawēn idipat o'ġuwēn owebe. Ka'ūma ma juk omutaybitbin ijodiat pit. Jesus Cristo acā juk adi omutybitbin.

¹³ Judeuyū etabucap co'i wetabun puje, juk adi ipiat osupi'ajojoat Jesus kay itabucayū be. Kuy eyetaybit apēn cuk adi ojekukuku iam. Wetakoma jījā juk adi oġuy ixeyū kay. Yaoka ojuyjuy ip cuk adi oġuy. Imēn cuk adi ojekukuku Jesus Cristo odopabijuk'ūm pima.

¹⁴ Waġuywaġoyū bodi ma juk adi wetabut oġuy Deus kay.

Judeuyū babim cuk adi wetabut oğuy. Cebodi ma ip we'ajojoyū'ūm'ūm ekawēn tağ cuk adi jeku ojuyjuy oğuy.

¹⁵ Deus pit cuk onaē jekawēn muwēn ām, warara'acat podi ma ixē xipan okuğ puyē. Okap awap ma juk onaē.

¹⁶ Ixē juk jekpot o'ğubapuk owebe.

— Okpot cuy eğuwēnuwēn Judeu'ūmayū be — i juk adi o'e owebe. — Kawēn idipat cuy eğuwēnuwēn cebe ip — i juk adi o'e o webe.

Imēn i'e buje, ka'ūma kay ma juk oju wawē ām. ¹⁷ Jerusalém ka be dak cuk oju ġu Jesus emumujuyū eju kawēn ām—kuy bima Deus o'taē'iyū eju kawēn ām. Ixeyū be wawē ām ġu juk oju. Arábia eipi kay bit cuk oju. Ģuyjom acā juk ocepit Damasco ka kay. ¹⁸ Ebapūğ koato kap puje juk oju Jerusalém ka kay Pedro jom. Xepxep esemana ma juk adi oğuy cexe. ¹⁹ Warara'acayū bit cuk ojojoko ġu Jesus emumujuyū. Tiağo acā ġuto ojojoko—wuykukukat Jesus kitpit acā.

²⁰ Napa ġu ōn e'em eywebe. Deus ojojom ijudup mubarararağ pima.

²¹ Pedro eju wekawēn epere buje, Síria eipi dağ cuk adi ojekukuku, Cilícia eipi dağ tak. ²² Imēnpuyē Cristo kay itabucayū ojojoko ġu ip—Judéia eipi watwat—wara'at ka dağ ōn jekukum puyē. ²³ Warara'acat ekawēn pit cuk ip o'jojoko kuy.

— Paulo juk adi ipiat o'supi'ajojoat wuywebe — i'e'em warara'acayū itabucayū jewewebe. — Jesus kay wuyetabucap mu'ūm ojuy osunuy — i'e'em ip. — Ģasū bit ixē dak Jesus muwēnuwēn o'e! — i'e'em ip. — “Jesus kay juy eyetabun epesop!” i'e'em ixē ma — i'e'em ip.

²⁴ Wawēğ co buje:

— Bay, ēn soat podi ma a'ōbaca — io'e ip Deus pe. — A'ōbacaam cuk Paulo eğutabun ekpot kay — io'e ip cebe.

2

¹ Catorze koato kap puje, ocepit Jerusalém ka kay. Barnabé eju oju. Tito dak otujowat oweju. ² Ibo ka kay oju “Jerusalém ka kay juy eju” i juk adi Deus o'e owebe buye. Jesus kayayū kukuk'ukayū o'je'awero wa'ijo am. Warara'acayū eju ġu juk ocekawēn—ixeyū eju acā. Apēn cuk adi kawēn idipat oġuwēnuwēn Judeu'ūmayū be iap oġuwēn cebe ip. Apēn cuk adi ixeyū oġutaybitbin iap tak oġuwēn ma. Obu'u juk adi oġuy ixeyū be “Te'e ma juk adi eġutaybitbin ip cedaġ'ūma ēn imutaybitbin puye” i'e am owebe. ³ Wuykitpit Tito juk otujowat owebe. Judeu ġu ixē.

— Teku juy ataypu'aġobixeedakacat wuy-dobuyū'ūm'ūm pabi daġ—Deus ekawēn taġ — i'ūmġu o'e ip itabucayū kukuk'ukayū ma—Judeuyū ma.

⁴ Warara'acayū bit oōm oce'aweroroap'a be, o'ġukūyjo ġu ma'ġu ip. “Oceju dak ocetabut Jesus kay” i napa ma e'e'ukayū oōm ip ocekawēn co am oca'ōxikap ojuy. Jewemukorēm ojuy ip.

— Teku juy ataypu'aġobixeedakacat wuy-dobuyū'ūm'ūm ekawēn taġ — io'e ixeyū ma. — Apēnpuye dak eybu'u wuydobuyū'ūm'ūm pabi daġ jekum Jesus eju mūġ'i eyeku buje? — io'e ip ocewebe. — Imēn cūġ ġu Deus xe — io'e ip ocewebe. — Wuydobuyū'ūm'ūm pabi daġ cuy epeku, Jesus kay a'ġu eyetabut ma — io'e ip ocewebe.

⁵ Ixeyū ekawēn kay ġu bit oceju—pūġ em tak ka'ūma.

— Ha'a wuydobuyū'ūm'ūm pabi daġ cuy ajeku cūġ ma wuy'e am Deus xe — i'ūmġu juk adi oce'e oceju bit. Imēn oce'e buje, kuka juk kawēn idipat oceġuwarurun. Ijo'i ġu kuka juk o'e. Imēn oce'e buje, eymuġuykuku kuka juk oceju.

⁶ Iġo'a be o'je'awero ip itabucayū kukuk'ukayū. Soat xe ya'ōbuyxi ip osodop. Yoboġ ġu ip oxe bit ijodiat pit. Deus kacūġ kay ġu aġ—badi acā. Iisuan ġu ixeyū bit omutaybin.

— Wara'an pit cuy eġutaybin Judeu'ũmayũ — i'ũmġu o'e ip owebe. ⁷ — Deus cuk Paulo o'jomuy kawën idipat muwën ãm Judeu'ũmayũ be. Judeuyũ be bit Pedro o'jomuy kawën idipat muwën ãm — io'e ip jewewebe.

⁸ Deus ja'õbacaap o'ġũm owebe jekawën muwën ãm Judeu'ũmayũ be. Ixe emumuju õn. Judeuyũ be bit jekawën muwën ãm ja'õbacaap o'ġũm Pedro be.

⁹ — Deus Paulo mujujum jekawën muwën ãm Judeu'ũmayũ be — io'e ip itabucayũ kukuk'ukayũ—Tiago, Pedro dak, João dak. Imënpuye juk ip obumukuġ. Barnabé bumukuġ tak ip jeburerexi ip puye.

— Judeu'ũmayũ be eyju ma juy Jesus ekawën epeġuwënuwën. Ocejũ bit cuy Judeuyũ be oceġuwënuwën — io'e ip. ¹⁰ Pũġ ma ip ocemuġebu. — Ġebum cuy epesop tadaybotbocayũ kay—itabucayũ kay—ocexeayũ kay — i juk o'e ip ocewebe. — Dinheiro'in cuy epeġudot cekay ip, ka'ũma kuġ puye — i juk o'e ip ocewebe.

Õn tak ocokcok cĩcã oce imudot am.

¹¹ Ġuyjom ma Pedro oajëm ocekey, oceju Antioquia ka be bima. Õn pit xeku oġukorëm warara'acayũ etabun ma, warëmtaġ ma jekukum puye. ¹² Tiago jebureyũ o'ġudot ocekey. Antioquia ka be ip oajëm. Ixeyũ ajëm'ũm pima, Pedro jekõnkõn'uk osunuy itabucayũ eju—Judeu'ũmayũ eju—Judeuyũ babi daġ jekuku'uk'ũmayũ eju—taypu'aġobixeedakatkat'ũmayũ eju. Tiago bureyũ ajëm puje bit, ibu'u o'e jekõn ãm ceweju ip—Judeu'ũmayũ eju. Iparara osunuy Judeuyũ buxim— “Judeu'ũmat jedaypu'aġobixeedakacan cuy cũġ ma i'e am Deus xe, itabut ma'ġu ip Jesus kay” i'e'e'ukayũ buxim. ¹³ Imënpuye Pedro buxim o'e ip warara'acayũ Judeuyũ. Pũġ taġ ma oeku ip jeweweju Judeuyũ. Jeparara

pibun ibu'u o'e ip Judeu'ũmayũ eju jekum. Barnabé dak ixeyũ buxim iparara o'e. Pũğ tağ ma oeku Judeuyũ eju. Judeu'ũmayũ eju bti ibu'u o'e jekum jeparara pibun. ¹⁴Cũğ ğu o'e ip jekukum. Kawēn idipat tağ ğu ip jekukum o'e. Iboap co buje juk ocekawēn Pedro eju warara'acayũ etabutpe.

— Ĕn Judeu — i juk oce cebe. — Inaka Judeu'ũmat co'i Ĕn jekukum — i juk oce cebe. — Judeu ekukuap puxim ğu Ĕn jekukum — i juk oce cebe. — Apēnpuye dak Ĕn e'em Judeu'ũmayũ be “Judeuyũ babi dağ cuy epeku!” i? — i juk oce cebe.

¹⁵Oceju bit Judeuyũ ocekapap pin ma.

— Ikērēat mujurũğrũğ'ukayũ Judeu'ũmayũ — i oceju e'em, ocedobuyũ'ũm'ũm ekawēn tağ ğu ip jekukum puye. ¹⁶Wuyju bit kuy wuyetabut Jesus Cristo kay. Deus xe wuyju cũğ ma wuydobuyũ'ũm'ũm ekawēn tağ wuyekuap tomuju ğu—wuyetabucap tomuju acā. Deus xe wuyju cũğ ma wuydobuyũ'ũm'ũm ekawēn tağ jekukum puye ğu—wuyetabut puye acā. Ka'ũma ma cũğ ma Deus xe jedobuyũ'ũm'ũm ekawēn tağ jekuap tomuju.

¹⁷— Cristo kay wuyetabun puje acā cũğ ma acesop Deus xe, wuydobuyũ'ũm'ũm ekawēn tağ jekukum ğu ma'ğũ wuyju — i wuyju e'em.

Imēn i'e buje, ibapuk e'em soat pe Judeu'ũmayũ jo'i ma wuyju dak ikērēat muğēğē'ukayũ iap. Ibu'u ğu paxi Cristo je'e wuywebe ikērēat muğē ģm? Ibu'u ma! Cedağ ğu cexe. Ijo'i ğu cexe.

¹⁸— Wuydobuyũ'ũm'ũm ekawēn tağ wuyekukuap tomuju ğu wuyju cũğ ma Deus xe—wuyetabucap tomuju acā — i'e'e'uk cuk adi oğuy. Imēnpuye “Wuydobuyũ'ũm'ũm ekawēn tağ cuy ajeku cũğ ma wuy'e am Deus xe” o'e buje, kuyat wekawēn kuka ocepere, wuydobuyũ'ũm'ũm pabi dak kuka oğupubutbun. ¹⁹Iba'ore owebe cũğ ma i'e am

Deus xe wuydobuyũ'ũm'ũm ekawẽn tağ wekuap tomuju. Deus ekawẽn tup cocom cuk wetaybin iboam. Iba'ore soat pe wuywebe soat iboap ekawẽn tağ jeku am. Wuydobuyũ'ũm'ũm pabi dağ wuyekuap tomuju wuyju cũğ ma Deus xe ibima apẽğãm Cristo oe'ũ korosa be? Ka'ũma ãm ma! ²⁰ Jekpiwan ma Jesus oe'ũ korosa be owebeam iap kay wetabut pima, obikuyap tağ ğu õn jekukum. Cristo biõğbuk omuy owebe. Kuyje wekukukuap kuy ocepere. Deus ipot kay wetabucap eju õn jekukum ğasũ bit. Ixe ipot jekpiwan ma oe'ũ we'ũap puxim, okukpin cĩcã cexe buye. ²¹ Deus ibikuy soat kuk am xipan.

— Okuğ ğu juy! — i'ũmğũ õn pit e'em cebe. Õn pit imẽn ğu e'em. Wuydobuyũ'ũm'ũm pabi dağ wuyekuap tomuju wuyju cũğ ma Deus xe ibima, apẽğãm Cristo oe'ũ korosa be? Ka'ũma ãm ma!

3

¹ Galácia eipi watwat, eyağuyba'arēm cĩcã! Abu dak cuk eymuğuykuku? Abu dak cuk eymubu'un kawẽn icēmat tağ eyekuap puxim? Apẽn Jesus Cristo oe'ũ korosa be iap cuk adi oceğuwẽn eywebe. Ibapuğ ma juk adi oceğuwẽn eywebe. Imẽnpuye juk adi eyetabut cĩcã epesop cekay.

² Pũğ ğu buk oğuwẽn eywebe. Deus jebiõğbuk o'ğũm eywebe wuydobuyũ'ũm'ũm ekawẽn tağ eyekuap puye ğu! Ibiõğbuk oõm eywebe apẽn Cristo oe'ũ iap ekawẽn eyetaybit puye; iboap ekawẽn kay eyetabut puye dak.

³ Eya'õbacaam ğu juk epesop Deus ebekitkiyũm—Deus biõğbuk a'õbacaam acã. Ğasũ bit:

— Wuya'õbacaam ma ixē a'õ dağ ajeku — i eyju e'em te'e ma.

Eyağuyba'arēm cĩcã dak epesop. ⁴ Kuy bima juk adi eyetabut cĩcã epesop Jesus kay, ipiatpi'ajojoan ma'ğũ ip eywebe itabut'ũmayũ. Ğasũ bit xe'e jeybu'un cekay?

Te'e ma du juk adi ipiat epesupi'ajojo? Iba'ore!
⁵ Deus cuk adi jebiõgbuk a'õbacaap o'gũm eywebe. Ixe a'õbacaam wuywebe i'e ba'oreat cuk adi epeğubapukpukpuk soat etabutpe. Ja'õbacaap o'gũm eywebe wuyawẽwẽap ekawẽn tağ eyju jekukum puye ğu. O'gũm eywebe eyju Deus ekawẽn kay jĩjã buye, cekawẽn kay eyetabut puye dak.

⁶ Abraão etabucap puxim eyju dak cuk adi eyetabut epesop Deus kay. Imẽn Deus Abraão o'ğuwẽn: — Ixe juk adi itabut cĩcã osunuy okay — i. — Imẽnpuye cũğ ma osunuy oxo i.

⁷ Ixe-buxim itabucayũ Abraão naxeğebitbicayũ Deus xe, Judeuyũ ğu ma'ğũ ip. Iboam cuy eyetaybin. ⁸ Deus cuk adi o'e jewebe ma:

— Ğuyjom cũğ ma jeedop ip oxo warara'acayũ dak—Judeu'ũmayũ — i. — Itabun puje ip cũğ ma jeedop ip oxo Judeuyũ jo'i ma — i juk adi o'e jewebe ma.

Imẽnpuye imẽn e'em Deus ekawẽn tup:

“Õn ma xipacat oğũm soat ka watwat pe, ãn etabut okay buye,” i'e'em Deus Abraão be, i.

Imẽn Deus kawẽn idipat o'ğuwẽn Abraão be xipacat ùm awap soat ka watwat pe. ⁹ Abraão itabut cĩcã osunuy Deus kay. Imẽnpuye Deus xipacat o'gũm cebe. Ixe-buxim soat itabucayũ dak xipacat jeejat Deus xewi.

¹⁰ Imẽn e'em Deus ekawẽn tup:

Wũy ma jeedop ip Deus wi ipiat'ajojom wuyawẽwẽap ekawẽn tağ jekukum'ũm pima, soat ekawẽn tağ jekukum'ũm pima, i.

Imẽnpit iba'ore soat pe wuywebe soat ekawẽn tağ wuyeku am wuyawẽwẽap ekawẽn tağ. Imẽnpuye:

— Xipat ğu eyju oxo — i'e'em Deus soat pe—
 “Wuyawẽwẽap ekawẽn tağ wuyeku buje acã cũğ ma ace-sop Deus xe” i'e'e'ukayũ be.

¹¹ Deus cuk adi o'e:

— Eyetabut okay bima acã, cūḡ ma epesop oxe — i.

Imēnpuye wuyawēwēap ekawēn taḡ wuyekuap puye ḡu cūḡ ma acesop Deus xe. Imēntak e'em Habakuque ekawēn tup—kuyjeat ekawēn tup—Deus ekawēn muwēnuwēn'ukat ekawēn tup:

Itabucat ma cūḡ ma Deus xe, i. Soat em itait jeenuy Deus xe, i.

¹² Imēnpit itabut'ūmat tak wuyawēwēap ekawēn taḡ jeku ojuy. Imēntak e'em Deus ekawēn tup:

Wuyawēwēap ekawēn taḡ jekuku'ukat acã cūḡ ma jeenuy Deus xe—soat ekawēn taḡ jekuku'ukat, i. Soat em itait jeenuy Deus xe, i.

¹³ — Xipat ḡu ěn oxe — i'e'em Deus soat pe—ikērēat mujurūḡrūḡ'ukayū be.

Cristo bit oe'ū apēn cuk adi ikērēat aḡujurūḡrūḡiap teida am. Imēn e'em Deus ekawēn tup:

Korosa eju ibamupayaat wūy ma jeenuy Deus wi ipiat'ajojom ikērēat kuḡ puye, i.

Korosa eju bima: — Wūy ma juy eḡuy owi ipiat'ajojom ikērēat kuḡ ěn puye — io'e Deus Jesus pe.

Wuywebe ḡu imēn o'e. Jesus pe acã imēn o'e, apēn cuk adi ikērēat aḡujurūḡrūḡ iap kuḡ puye. ¹⁴ Deus o'e Abraão be: — Xipacat oḡūm soat ka watwat pe, ěn etabut okay buye — i.

Jesus Cristo kay Judeu'ūmayū itabun puje, Deus xipacat je'ḡūm cebe ip. Xipacat je'ḡūm cebe ip korosa eju Cristo apēn cuk adi ikērēat aḡujurūḡrūḡ iap o'tujowat jewebe buye. Imēnpuye Deus jebiōḡbuk muōmōm wuywebe wuyetabut puye. Imuōmōm wuywebe apēn cuk adi o'e Abraão be iap taḡ.

¹⁵ Okitpitpiyū, apēn jebapukpuḡ soat kabia wuywebe iap taḡ ōn jeymutaybin. Abu wuybubut je'jat

wuye'ũ buje iaptup mubararak pin pima, wuyju wuybutet mubarararağ ixedup pe. Wuybure dak jebetet mubarararağ ixedup pe. Xepxep putet mubararak puje, iba'ore warara'acat pe iboaptup ekawën mupubut am. Iboaptup ekawën muwarurun am tak iba'ore ma cebe ip.

¹⁶ — Xipacat oğüm ewebe, enaxeğebit pe dak — i juk adi o'e Deus Abraão be.

“Enaxeğebitbiyũ be” i'ümğũ e'em ibodup. “Enaxeğebit pe” i acã e'em. Adeayũ be ğũ kuka xipacat o'ğüm. Pũğ pe ma kuka o'ğüm—Cristo be ma. ¹⁷ Imën õn e ojuy eywebe. Deus cuk kuy o'e Abraão be:

— Xipacat oğüm soat ka watwat pe, ãn etabut okay buye — i. — Soat em wa'õ dağ õn e'em — i juk o'e.

Ğũyjom acã wuyawẽwẽap ekawën o'ğuwën Moisés pe ixebem imuwën ãm jebekitkit pe—430 koato kap puje ma. Wuyawẽwẽap ekawën muwën puje bit:

— Obu'u oce xipacat ãm ãm Abraão be ğasũ bit — i'ümğũ o'e Deus. — Apën cuk oce cebe iap tağ ğũ oce ğasũ bit — i'ümğũ o'e.

¹⁸ Wuyawẽwẽap ekawën tağ wuyekuap puye Deus xipacat ãmũm wuywebe bima, apën cuk adi o'e Abraão be iap tağ ğũ kuka o'ğüm wuywebe. Imënpit Deus xipacat o'ğüm Abraão be “Xipacat oğüm ewebe ãn etabut okay buye” io'e buye. Deus ja'õ dağ e'em soat em.

¹⁹ — Apënpuye dak Deus wuyawẽwẽap ekawën o'ğuwën Moisés pe? — i du eyju e'em owebe?

Õn jeymutaybin. Wuyawẽwẽap ekawën o'ğuwën wuymutaybit am ajo Deus bikuyap tağ ğũ iam. Ğũyjom kuka Abraão naxeğebit o'kap—Jesus Cristo. Deus xipacat kuka o'ğüm cebe ja'õ dağ. Ikap'ũm pima bit, kuy juk adi wuyetaybit ajop soat ipi juacat kũyjobit'ũm ip Deus a'õ kay iam. Deus ma o'jekawën Abraão be.

— Xipacat oğüm ewebe — i juk o'e cebe.

Wuyawēwēap ekawēn muwēn pin pima bit, ijodiacat eju ġu o'jekawēn. Koap jekawēn tojtot'ukayū be o'ġuwēn. Ixeyū o'ġudot jekawēn muwēn ām ijodiacat pe. Ijodiat ma ġuwēn iboap wuywebe. ²⁰ Wuyju warara'acat mujujum wuybure kay imukūyjo pin pima. Imēnpuxim Deus ixeyū o'ġudot ijodiacat mukūyjo am, ixeyū be “Ha'a, ijop ekawēn taġ cuy ajeku” i'e am. Deus pit pūġ ma. Wuyju imujuap wiwim ġu Deus, ja'ōbi ma e'em puye. Wuywebe bit iba'ore imuju am. Iba'ore wuywebe “Ēn imēn ece'e. Ōn tak wara'at taġ oce” i'e am Deus pe, ixē mujujum ġu wuyju buye. Ja'ōbi ma: — Xipacat oġūm ewebe — i juk o'e Abraão be.

²¹ — Eyetabun puje acā cūġ ma epesop oxe — i'e'em Deus.

— Cūġ ma epesop oxe eyawēwēap ekawēn taġ eyeku buje acā — i dak tu e'em wuywebe?

Xepxep ekawēn taġ tu Deus e'em wuywebe? Ka'ūma! Deus pe wuymucūġ put wuyawēwēap ekawēn muwēn ām ibima, “Eyawēwēap ekawēn taġ eyeku buje acā cūġ ma epesop oxe” i kuka juk o'e Deus wuywebe. ²² Imēn e'em Deus ekawēn tup:

Soat ipi watwat ikērēat kuġ, i.

Iba'ore soat pe wuywebe wuyawēwēap ekawēn taġ wuyeku am—soat ekawēn taġ. Imēnpuye pūġat kay wuyetabun puje acā cūġ ma acesop Deus xe—Jesus Cristo kay wuyetabun puje acā. Soat ixē kay itabucayū xipacat jeejat Deus xewi “Xipacat oġūm soat pe itabucat pe” io'e Deus puye.

²³ Kuy bima juk adi wuyetaybit ġu ajop wuyetabut am. Warara'acat pe wuymutaybicat wiwim cuk adi ajop wuyetabut am Jesus kay. Taomūnmūnat puxim cuk adi ajop wuyawēwēap ekawēn taġ jeku ojuy. ²⁴ Bekitkit puxim cuk adi ajop. Bekicat kukat puxim wuyawēwēap

ekawēn wuykuḡ osunuy. Ikukat bekicat mukūyjojom ixe be warēmtaḡ ma jekuap puxim. Imēnpuxim wuyju dak wuyawēwēap ekawēn taḡ cuk adi ajekuku warēmtaḡ ma wuyekuap puxim. Cristo ajēmap wiwim cuk adi ajop. Yajēm'isum cūḡ ma acesop Deus xe Cristo kay wuyetabucam acã.

²⁵⁻²⁶ Ḡasū bit wuyetabut Cristo kay. Mūḡ'i wuyju ceweju. Ixe kay wuyetabun puje bekitkit puxim ḡu ajop. Deus ipotpoyū ma ajop yaypanayū buxim. Imēnpuye wuyawēwēap ekawēn taḡ ḡu ajeku ḡasū bit. Bekicat ikukacecat puxim ḡu wuyju. ²⁷ Eyetabun puje, kuy juk eymubatisananat “Jesus eju mūḡ'i ojeku ḡasū bit” i'e am soat pe. Ḡasū bit Cristo eju mūḡ'i eyju jekukum. Cristo buxim epeku. ²⁸ Cristo eju mūḡ'i jekukum pima, Judeu, Judeu'ūmat tak weḡūḡūn ma ip jekukum. Tei'ūma kapikpik'ukat, teibubum kapikpik'ukat tak weḡūḡūn ma ip jekukum. Ayacat, aḡokatkat tak weḡūḡūn ma ip jekukum, Jesus Cristo eju mūḡ'i jekukum pima.

²⁹ — Xipacat oḡūm enaxeḡebit pe — i juk adi o'e Deus Abraão be. Cristo eykukat. Imēnpuye Abraão naxeḡebitbicat eyju Deus xe. Imēnpuye xipacat epejat Deus xewi apēn ixe juk adi o'e cebe iap taḡ.

4

¹ Ḡebum cuy ajop apēn ipotpoyū jebay bubut pum iap kay.

— Yaypan pima acã okpot soat obubut je'jat jebubun — i'e'em cebay.

Yaypan'ūm pima bit, jebay eju kapikpik'ukat co'i ma ipot. Yaypan pima acã soat kuḡ jeenuy—jebay bubut kuḡ.

² Yaypan'ūm pima, warara'acayū bekicat kuḡ imukūyjojom. Warara'acayū cebay bubut kuḡ, cebay ekawēn taḡ

ma. ³ Bekicat yağuy'ũm bekin pima. Bekitkit puxim wuyju dak ajop wuyetabun'isum Jesus kay. Tũybe wuyawẽwẽap ekawẽn tağ wuyekuap tomuju cũğ ma acesop Deus xe iãn cuk adi ajop. ⁴ Imudocap kabia ajẽm puje, Deus jekpot o'ğudot ijodi. Wuyjo'i o'kap ayacat'uk pewi. Wuyawẽwẽap ekawẽn tağ cuk adi oekukuku Judeu buye.

⁵ — Iba'ore ocewebe soat ekawẽn tağ jeku am ocawẽwẽap ekawẽn tağ — i'e'e'uk ajop Deus pe. — Apẽntak cũğ ma acesop cexe? — i'e'e'uk ajop wuyewewebe.

Jesus pit e'em wuywebe:

— Wa'õbacaap oğũm eywebe—eyawẽwẽap ekawẽn tağ eyku am ğu—Deus ebekitkiyũm eye'e am acã! — i.

⁶ Ixe Deus cuk jekpot biõğbuk o'ğũm wuywebe “Eyju dak okpotpoyũ” i'e am wuywebe. Imẽnpuye:

— Bay! — i wuyju dak e'em cebe Jesus a'õ nomuju. — Bay — i'e'em wuyju ibiõğbuk a'õbi.

⁷ Deus eju kapikpik'ukayũ ğu a'ğũ eyju. Ipotpoyũ ma eyju. Imẽnpuye soat je'ğũm eywebe jekpotpoyũ be iũmũmap.

⁸ Kuy bima juk adi eyetaybit ğu epesop Deusan. Warara'acayũ kay juk adi eyetabut epesop. Tũybe iteyũ ma deusyũ iãn cuk adi epesop. ⁹ Ğasũ bit eyetaybit Deusan. Ixe dak o'e itaybit eyjum. Apẽnpuye dak waram eyetabut pin ma'ğuto deusbaroyũ kay? Te'e ma kuka eyetabut epesop cekay ip. Wuybuywan pa'ore ip cebe itaybit'ũm puye. Te'e ma du ixeyũ a'õ kay epe'e ğuto? Eyağuyba'arẽm! ¹⁰ Tũybe cũğ ma acesop Deus xe kabia muxipanpan pima iãn eyju e'em, kaxi muxipanpan pima dak iãn, koato muxipanpan pima dak i'an eyju e'em. ¹¹ Wağuybabi'ũm'ũm cĩcã eykuğ. Te'e ma du juk adi ocekapik kawẽn idipat muwẽnuwẽn eywebe? Wağuybabi'ũm'ũm cĩcã eykuğ.

¹² Okitpitpiyū, Cristo a'ō kay kūyjobin cuy epesop obuxim. Ōn tak eybuxim ya'ō kay. Ōn cuk adi eyburem oğuy. Eyju dak cuk adi warēmtağ ğu epesop okuğ. ¹³ Koap weku buje, kawēn idipat epeya'įjojo ğu buk. Ōn pit cuk oju imuwēn ām eywebe owātaxipi buye. Oju ğu wara'at ka kay. ¹⁴ Eyağuybabi'ūm'ūm cuk adi epesop okuğ owātaxipi buye. Owātaxipiap waywayway ğu juk adi epesop.

— Paulo kay ğu oceju soat em iwātaxipi buye — i'ūmğū juk adi epe'e'e.

Eyduk'a be juk adi eyju okuk. Xipan cuk adi eyju okuk kabi bewiat kukap puxim—Deus ekawēn tojotjot'ukat kukap puxim—Jesus Cristo kukap puxim. ¹⁵ Eycokcoğ cuk adi epesop okuğ. Okay jįjā juk adi epesop. Apēnpuye dak epe'e okay ğu ğasū bit? Iba'ore'ūm pima eyeta kuka juk epesutaūm owebe wetam. ¹⁶ Icēmān acā juk adi ocekawēnwēn eywebe. Apēnpuye eyju ğasū okay ğu?

¹⁷ Jewexe ma ip eykay ixeyū warēmtağ ma eymutay-bitbin'ukayū. Eymu'ağuyba'arēm ojuy ip okay'ūm ām. Ibu'u ip eywebe okay am. Ibikuy ip jewekay i'e am apēn kuy bima okay jįjā epesop iap puxim. ¹⁸ Xipat wuywebe warara'acat kay am xipat i'e ojuy bima. Ixeyū mu'ağuyba'arēm ojuy bima bit, xipat ğu kuka o'e cekay am. Iboap icēmān soat em. Eykukpin cīcā oxe, eyxe ğu'ma'ğū ōn. ¹⁹ Bekitkit, eykukpin cīcā oxe. Ayacat i'itpiat puxim ōn. Wağuybabi'ūm'ūm cīcā eykuğ. Cristo ekukuap puxim eyju dak jekukum iap wiwim ōn ayacat je'it kapap wiwim iap puxim. ²⁰ Wağuybabi'ūm'ūm cīcā eykuğ. Eyxe pin cīcā oxe. Apēntak ōn jeyawē?

²¹ — Moisés ekawēn tağ cuy ajeku—wuyawēwēap ekawēn tağ — i te'e ma eyju e'em.

Eyeta bit tu apēn wuyawēwēap ekawēn e'em iam?

²² Ğebum cuy epesop Abraão ipotpoyū kay—xepxepayū kay. Xepxep osodop ip Abraão ipotpoyū. Pūğ ma ixi

tei'ũama kapikpik'ukat osunuy Abraão duk'a be. Wara'at xi bit Abraão tayxiat osunuy. ²³ Kapikpik'ukat it o'kap wuykapap puxim. Itayxiat it pit Deus a'õbi o'kap. O'kap “Ekpon oğũm ewebe” io'e buye. ²⁴ Xepxep aoyũ xepxep em Deus jekawẽn o'ğuwẽn jebekitkit pe iap puxim. Jekawẽn o'ğuwẽn jebekitkit awẽwẽ ãm. Co'a bicũğpe bima o'ğuwẽn Moisés pe, Sinai'a bicũğpe bima. Wuyawẽwẽap ekawẽn tağ jeku ojuyayũ tei'ũama kapikpik'ukat it puxim—Agar it puxim. ²⁵ Agar co'a buxim—Sinai'a buxim—Arábia eipi beat'a buxim.

— Wuyawẽwẽap ekawẽn tağ wuyekuap tomuju acã cũğ ma acesop Deus xe — i te'e ma e'em pũğpũğayũ. Agar it puxim ixeyũ—Ismael buxim—tei'ũama kapikpik'ukat it puxim. Jerusalém ka ixeyũ Judeuyũ ka. Ixeyũ a'õ kayayũ dak wuyawẽwẽap ekawẽn tağ jeku ojuy cũğ ma i'e am Deus xe. ²⁶ Wara'at ka bit opop. Jerusalém ka buxim ibo ka. Kabi bewiatka bit ibo ka. Wuyju ma ibo ka watwat. Itayxiat it puxim wuyju—Isaque buxim.

— Cũğ ma wuyju Deus xe wuyetabut puye — i wuyju e'em.

²⁷ Imẽn e'em Deus ekawẽn tup:

Tũ'ũ, ecokcoğ cuy eğuy e'it'et ğu ma'ğũ ĩn, i. Ecokcoğ cuy eğuy e'it esupi'ajo ğu ma'ğũ ĩn, i. Ayacat o'jepere iat iyũ ade je'e—jektop eju nuyat iyũ bodi ma, i.

Imẽn e'em Isaías emudupmubararaktup.

²⁸ Okitpitpiyũ, Deus a'õbi Isaque o'kap. Ixe buxim eyju dak ya'õbi Deus ipotpoyũm epesop. ²⁹ Wuykapap puxim o'kapiat Deus biõğbuk a'õbi o'kapiat kaykay jĩjã osunuynuy. Ibabiwarere osunuynuy cekay. Iwaywayway acã osunuynuy. Ğasũ dak imẽn ma jebapukpuğ iboap. Wuykapap puxim o'kap'iyũ Deus biõğbuk a'õbiayũ kaykay jĩjã. Iwaywayway jĩjã ip. Warẽmtağ ip ikuğ. ³⁰ Imẽnpit, imẽn e'em Deus ekawẽn tup:

“Tei'ũama kapikpik'ukat cuy eğujēm eduk'a bewi,” i juk o'e Deus Abraão be, i. “Eğujēm cuy i'it eju ma,” i. “Etayxiat it puxim ġu ixē it,” i. “Jebay bubut je'jat ġu,” i. “Etayxiat it acã je'jat,” i.

³¹ Imēneju, okitpitpiyũ, ġebum cuy epesop iboap ekawēn kay. Tei'ũama kapikpik'ukat it puxim ġu wuyju—itayxiat it puxim acã.

5

¹ Cristo juk ja'ōbacaap o'ğũm wuywebe wuyjupinap tağ wuyeku am. Ixe a'ōbacaap kuğ cuy epesop soat em.

— Wuyawēwēap ekawēn tağ cuy ajeku cũğ ma wuydop am Deus xe — i waram pit cuy epe'e ġu.

Tei'ũama kapikpik'ukat puxim ġu juy epesop waram.

² Eya'ōpicũğcũğ cuy epesop wekawēn kay! Ōn Paulo. Judeu ōn. Jesus kay bit wetabut. Ōn ma jeymukũyjo. Warara'acat pe eydaypu'ağobixeedakacan pima, te'e ma kuka juk Cristo oe'ũ eywebeam. ³ Imēn ma ōn eymukũyjo-jom.

— Soat ekawēn tağ cuy epeku wuyawēwēap ekawēn tağ—Moisés ekawēn tağ — i ōn e'em soat pe o'jewedaypu'ağobixeedakacat'iaiyũ be.

⁴ “Cũğ ma acesop Deus xe wuyawēwēap ekawēn tağ wuyju jekukum puye” i'e'e'ukayũ wũy ma ip Cristo wi. Jetabucap kuy o'jepere ip. Ibu'u ip Deus pe xipan jekukan. ⁵ Wuyju bit wuyetaybit cũğ ma acesop Deus xe wuyetabut Jesus Cristo kay buye iam. Cũğ ma acesop cexe iap wiwim cĩcã wuyju. Iboap wiwim cĩcã wuyju soat em Deus biōğbuk wuya'ōmucanucan puye. ⁶ Jesus Cristo eju mũğ'i wuyju jekukum pima, yoboğ ġu Deus xe wuydaypu'ağobixeedakatkan pima, ixeedakatkan'ũm pima dak. Yoboğ pit cexe wuyetabucap acã. Wuyetabut pima xipan tak acejewekuk.

⁷ Kuy juk adi eyetabut cĩcã epesop Jesus Cristo kay. Abu juk kawẽn icẽmat kay eymubu'un? Apẽn cuk eymubu'un? ⁸ Apẽn xe'e ixẽ eyağuyumuwarurun? Deus ğu eyağuyumuwarurun. Deus ğu eymubu'un. Ixe juk eynaẽ cũğ ma eyeku am jexe.

⁹ — Tõm'it ma soat'a muyuhuhum—pão'a muyuhuhuaptõm. Yaboğ e'em — i wuyju e'em. Imẽnpxim pũğ ma warẽmtağ ma eymutaybitbin pima, soat kuka warẽmtağ ma epeku.

— Wuyawẽwẽap ekawẽn tağ wuyekuap tomuju cũğ ma acesop Deus xe — i kuka o'e soat te'e ma.

¹⁰ Õn pit wetabut mabuk eykay. Wetaybit waram ğuto eyağuyusat epe'e iam. Waram ğuto kawẽn icẽmat kay epesop. Wetaybit iboam mũğ'i wuyju wuykukukat eju buye. Warẽmtağ ma eymutaybitbin'ukat pe bit Deus ipiat supi'ajoat—ya'õbuyxi'umat pe, ya'õbuyxiat pe dak.

¹¹ Okitpitpiyũ, okay'ũmayũ te'e ma wawẽgmukẽrẽrẽrẽn.

— Paulo e'em wuywebe “Jewedaypu'ağobixeedakatkacan cuy epesop”, i — i napa ma e'em ip soat pe.

Kuy bima juk adi ocece iboam soat pe. Ğasũ bit oce ğu imẽn. Imẽn õn e'em pima, itakoma ğu kuka adi Judeuyũ okay. Ixeyũ ma e'em imẽn soat pe. Õn pit e'em:

— Cũğ ma epesop Deus xe eyetabut pima Jesus oe'ũ korosa be wuywebeam iap kay — i.

Imẽnpuye buk ip itakoma ma okay. ¹² “Jewedaypu'ağobixeedakatkacan cuy epesop Moisés ekawẽn tağ” i'e'e'ukayũ be bit:

— Epeyewedaxibada'uk cuy pũğ em ma — i õn e'em.

¹³ Okitpitpiyũ, Deus cuk wuynaẽ wuyjupinap tağ wuyeku am. Imẽnpit:

— Obikuyap tağ cuy ojeku jewemucokcokcoğ, Deus onaẽ ojupinap tağ weku am puye — i'ũmğu juy epe'e. Eybikuyap tağ ğu juy epeku jewemucokcokcoğ. Xipan cuy epeyewekuk. Jewebuywatwan tak cuy epesop! ¹⁴ Imẽn e'em wuyawẽwẽap ekawẽn tup: Xipan cuy warara'acat ejukuk ewekukap puxim, i. Eywebe xipan warara'acat kuğ pima, wuyawẽwẽap ekawẽn tağ eyju jekukum soat ekawẽn tağ. ¹⁵ Ika'uat puxim jewewekuğ pima bit, kuka xipan jewewekuap epeyepere, jewemuymuy bima dak, jewawẽgmukêrêrêrên pima dak.

¹⁶ Õn mabuk jeyawẽ. Eybikuyap tağ ğu juy epeku jewemucokcokcoğ. ãğ cuy Deus biõğbuk jeyağuydada. Ixe eyağuydadam pima warêm̄tağ ğu kuka epekuku ikêrêat muğêğm̄. ¹⁷ Ajo Deus biõğbuk cekay iap ajo wuyju cekay iap ğu. Apẽn Deus biõğbuk ibikuy iap puxim ğu wuyju bit wuybikuy. Apẽn wuybikuy iap puxim ğu dak Deus biõğbuk pit ibikuy. Deus biõğbuk bikuyap tağ jekuku'ukat jebikuyap tağ ğu jekukum jewemucokcokcoğ. Imẽnpuye ixe biõğbuk bikuyap tağ jeku pin pima, wuybikuyap tağ ğu kuka ajekuku—ix̄e bikuyap tağ acã. ¹⁸ Deus biõğbuk wuyağuydadam pima, wuyawẽwẽap ekawẽn tağ ğu kuka ajeku cũğ ma wuydop am Deus xe—kawẽn kuyat tağ ğu.

¹⁹ Wuybikuyap tağ jekukum pima, ikêrêat acã kuka ağũğẽ. Soat wuyetaybit iboam. Wuybikuyap tağ jekukum pima, warara'acat itop kaykay kuka ajop, warara'acat tayxi dak; ikêrêat kay acã dak kuka ajop ģebum; wuyekawẽnkêrêm̄ tak kuka ajop; ²⁰ deusbaroyũ kay dak kuka ajop wuyetabun; wuybukaypan tak kuka ajop; warara'acat aoka pin tak kuka ajop; jewa'õxixiğ tak kuka ajop; wuyetakomãmãm̄ tak kuka ajop warara'acat kay; wuyetabikukum tak kuka ajop soat kay; wuya'õbuyxian pin tak kuka ajop; wuyewejak'ũm tak kuka ajop wuybu-reyũ kay; ²¹ wuyetabutkarey dak kuka ajop; wuyka'o'om

tak kuka ajop; jewetabutpe ma kuka ajop aoyū dabi'o'om peta muḡēḡēm pima. Wuybikuyap taḡ jekukum pima, warēmtaḡ ma kuka ajop. Deus soat kukukan pima, jeōm ḡu ip kabi be imēn jekuku'ukayū. Imēn cuk oce eywebe. Ḡasū dak imēn ma ōn e'em eywebe.

²² Deus biōḡbuk wuyaḡuydadam pima bit, ikukpin kuka warara'acat ajukukuk; wuycokcoḡ tak kuka ajop soat em; wuyaḡuybabibim tak kuka ajop; wuyukpiceḡēm ḡu dak kuka ajop; wuya'ōdidim tak kuka warara'acat ajukukuk; xipan tak kuka warara'acat ajukukuk; wuya'ō daḡ tak kuka ajekuku soat em; ²³ wuya'ōbuyxian pin ḡu dak kuka ajop; jewawēwēm tak kuka ajop ikērēat muḡēap puxim. Imēn wuyju jekukum pima, wuyawēwēap ekawēn taḡ kuka ajeku—kawēn kuyat taḡ. ²⁴ Jesus Cristo ebekitkiyū wuyju. Imēn wuyju jewawēwēm.

— Cristo oe'ū korosa be owebeam — i'e'em wuyju jewebe ma. — Ixe buxim oe'ūiat puxim cuy ojeku. Jewemucokcokcoḡ obikuyap taḡ ḡu juy ojeku — i'e'em wuyju jewebe ma.

Imēn wuyju jewawēwēm. ²⁵ Kuy bima Deus biōḡbuk wuymutabun Jesus Cristo kay. Āḡ cuy ḡasū bit ixē wuyaḡuydada. ²⁶ Wuya'ōbuyxian pin ḡu juy ajop. Warara'acat aḡutakomān ḡu dak cuy. Wuyetabutkarey ḡu dak cuy ajop warara'acat kay.

6

¹ Okitpitpiyū, wuybure be ikērēat muḡē buje, ixē juy epeyawē. Deus biōḡbuk a'ō kay kūyjobicat cuy ixē yawē. Eywebe dak xipāt'ūmat imuḡē ḡūḡūn ixē buxim. Imēnpuye eyday'em'um cuy epesop eywebe ikērēat kukap puxim. ² Jewebuywatwan cuy epesop. Jewebuywatwan pima, kūyjobit epesop Cristo a'ō kay. ³ Ya'ōbuyxi'ūmat “Ōn pit wa'ōbuyxi. Osubuywan ḡu

warara'acat" i'e'em pima, jeweğuykukukum. Te'e ma e'em — Cristo ebekit òn — i. ⁴ Ğebum cuy ajop wuyekukuap kay wuyetaybit am cūğ ma oceju jekukum iam, cūğ ğu iam tak. Cūğ ma jekukum pima, wuycokcok ace'e wuyekukuap kay.

— Ibo ekukuap co'i du wekukuap xipat Deus xe? — i ğu kuka ace'e.

⁵ Soat ma juy wuyekapikap ajukuk.

⁶ Warara'acat pe Cristo ekawēn wuymutaybitbin pima, wuybubut'in cuy ağu'e'ē cebe wuymutaybitbinapteim.

⁷ Jewemuğuykukukum ğu juy epesop. Deus ya'òmupubutpun pa'ore soat pe wuywebe. Ajo ataida iat tak kuka ajat ma. ⁸ Imēnpuxim jewemucokcokcoğ wuybikuyap tağ jekukum pima, ikērēat kuka ağujurūğ. Wuye'ū buje Deus wi wūy ma acesop. Deus biōğbuk mucokcokcoğ ixē bikuyap tağ jekukum pima bit, idipat kuka ağujurūğ ixē a'òbacaan, ibiōğbuk wuyağuydadam pima dak. Wuye'ū buje, waram acejetait. Deus xe acesop soat em. ⁹ Wuybu'u'um ğu juy ajop xipacat muğē ām. Xipacat puap kabia be xipacat acejat wuybu'u'u'ūm pima. ¹⁰ Imēnpuye xipan warara'acat kukap cuy acejepere ğu. Warara'acat podi ma itabucayū ajukuk xipan.

¹¹ Obum ma ijudup mubarararağ òn. Yoboğ cīcā we-mumubararak. ¹² Xipan jewemuwēnuwēnayū ma e'em eywebe:

— Jewedaypu'ağobixeedakatkacan cuy epesop cūğ ma Deus xe eydop am — i.

Yoboğan pin ip. Jesus Cristo oe'ū korosa be iap muwēn pu'u jījā ip. Iparara ip Jesus Cristo kay'ūmayū ipiat supi'ajoat cebe ip iap puxim. ¹³ Jedaypu'ağobixeedakatkacat ip. Soat tağ ğu bit ip jekukum wuyawēwēap ekawēn tağ ğu. Eywebe

jewedaypu'ağobixeedakatkacat ojuy ip, “Ade ma oca'õ kay kũyjobit” i'e ojuy ip puye.

¹⁴ — Mẽnku xipat wuywebe cũğ ma wuydop am Deus xe, ģoku ģuto — i'ũmġu õn pit e'em. — Wuykukukat Jesus Cristo oe'ũ korosa be wuywebe cũğ ma wuydop am Deus xe — i acã õn e'em.

Jesus kay'ũmat ekukuap puxim ġu weku pin ġasũ bit. Idip ġu o'e oxe iboap pit. Jesus kay'ũmayũ dak jeku pin ġu wekukuap puxim. Idip ġu cexe ip iboap. ¹⁵ Wuyağuy'isu bima, yoboğ ġu Deus xe wuydaypu'ağobixeedakatkacat pima, ixeedakatkacat'ũm pima dak. Ibitbit ma. Yoboğ pit cexe wuy'isum wuyeku am. ¹⁶ Õn kawẽnwẽn Deus eju yağuy'isum jekuku'ukayũ beam—Deus ebekitkit peam.

— Bay, ebekitkit ağuy mubabibin cuy eğuy — i õn e'em cebe. — Etabotaidabotbon cuy eğuy cekay ip — i õn e'em cebe.

¹⁷ Okaykay ġu juy ip jeedop. Wa'õmukorẽm ġu juy jeedop ip jewedaypu'ağobixeedakatkacan iam. Kuy werowero opop wukxabi dağ ade. Iboap coco buje, itaybit je'e ip Paulo kapikpiğ cĩcã wuykukukat Jesus peam iam.

¹⁸ Okitpitpiyũ, “Xipan cuy Galácia eipi watwat ejukuk” i õn e'em wuykukukat Jesus Cristo be. Xipan cuy jeykuk. Ibũrũn ma.

Deus ekawẽntup Kawẽn iisuat ekawẽn
New Testament in Mundurukú (BR:myu:Mundurukú)

copyright © 2010 Wycliffe Bible Translators, Inc.

Language: Mundurukú

Translation by: Wycliffe Bible Translators, Inc.

Mundurukú [myu], Brazil

Copyright Information

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mundurukú

© 2010, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

